

四庫全書

集部

欽定四庫全書

集部

文忠集卷一百四十五

詳校官庶吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>杜文海

欽定四庫全書

文忠集卷一百四

玉堂類稿四

宋 周必大 撰

詔書 記 劄子 序

加上太上皇帝太上皇后尊號詔

乾道六年十一月一日

門下饗帝者聖人爲能既深慙於涼德事親者天子之孝當益播於鴻名參古今甚盛之規侈家國非常之慶光堯壽聖太上皇帝與天同大體道之宗壽聖太上皇

后如月之明以慈爲寶久非心於黃屋方自得於大庭  
言念眇冲親膺傳授黽勉屢周於歲籥寅恭三款於陽  
陔祖宗遺我以閔休高厚畀予以景况匪仰遵於慈訓  
疇克對於昌期宜極推崇豈容滿假矧未央爲壽適符  
漢祖之九年而興慶歸尊且著唐宗之再請用消穀旦  
交舉曠儀俯同中外之歡心並衍尊親之榮號懇章繼  
上俞旨甫頒雖蕩蕩民無能名豈易測知於聖德然業  
業日致其孝庶幾單竭於忱誠以承有羨之休以對無

疆之壽光堯壽聖太上皇帝宜加上尊號曰光堯壽聖  
憲天體道太上皇帝壽聖太上皇后宜加上尊號曰壽  
聖明慈太上皇后其令有司詳具儀注朕當親率百官  
詣德壽宮奉上冊寶告於普率共此榮懷故茲詔示想  
宜知悉

舉賢良方正詔

乾道七年十月十一日

勅門下蓋聞制科取人盛於兩漢然或以陰陽靡調或  
以方內靡安乃勅郡國舉而行之本朝則不然無事而

勤求有爲而獲用上下交應爲後世法肆朕紹服於今  
十年詔書數下勤勤懇懇間復略傳註寬舉薦冀以招  
徠脩潔博習之士輔朕不逮屬者有司嘗以一二應書  
既命待詔公車矣歲當大比其博求之夫寤寐忠言寧  
厭乎多士抱負器業或患乎無時朕之誠意子大夫其  
著聞矣來游來歌以矢其音不在此乎今歲科場其令  
尚書侍郎兩省諫議大夫以上御史中丞學士待制各  
舉賢良方正能直言極諫一人守臣監司亦許解送仍

具詞業繳進以聞故茲詔示想宜知悉

改左右丞相詔

乾道八年二月五日

勅門下朕惟帝王之世輔弼之名雖殊而相之實一也  
在成湯時則有若伊虺在成王時則有如周召或左或  
右皆見於經厥後位號定於漢而稱謂汨於唐以僕臣  
而長百僚朕所不取且丞相者道揆之任也三省者法  
守所自出也今舍其大而舉其細豈責實之誼乎肆朕  
稽古釐而正之蓋名正則言順言順則事成爲政之先

務也其改尚書左右僕射同中書門下平章事爲左右丞相庶幾採前代之舊成本朝之制焉

加上太上皇帝太上皇后尊號詔

淳熙

二年十月五日

勅門下錫九疇之福而曰壽曰康亶敷言於帝訓有四  
海之富而得名得位丕佑命於天申胥同率土之心仰  
篤嚴君之慶光堯壽聖憲天體道太上皇帝剛健純粹  
徽柔懿恭以德行仁本性誠之固有脩文偃武合經緯



之自然異位當七十載之期敬休獲萬億年之報壽聖  
明慈太上皇后聖善明哲慈和靜專月齊日以得天而  
能久照坤順乾而配地是以廣生念非昭揭於鴻名何  
以對揚於鉅典且堯壽獨高於五帝時則有放勳之稱  
而魯邦僅列於諸侯尚能歌燕喜之頌矧予天下之養  
逢此古來之稀是宜稽紹興乾道之已行於以補兩漢  
有唐之未備博採羣公之議虔伸再駕之恭將祇迓於  
春祺庸對敷於寶冊一言以蔽固難形盛德之日新萬

壽無疆蓋欲輯曠儀而歲講式揚明命前詔多方庶令  
好善之民體我事親之孝光堯壽聖憲天體道太上皇  
帝宜加上尊號曰光堯壽聖憲天體道性仁誠德經武  
緯文太上皇帝壽聖明慈太上皇后宜加上尊號曰壽  
聖齊明廣慈太上皇后其令有司詳具儀注朕當親帥  
羣臣詣德壽宮奉上冊寶故茲詔示想宜知悉

科舉詔

淳熙四年二月一日

勅門下朕惟四術以造士三年而興賢崇化勵俗未有

或先於此者粵予涼菲寤寐髦雋郡國詔書凡五下矣  
期無愧於前聞有補於當世豈爲虛文也哉興言大比  
今復其時乃飭攸司申諭朕志其各以賢能之書來上  
朕將親策於廷使在我選中者皆足以章明治教振宣  
事功豈惟予一人以寧時爾多士亦有無窮之聞故茲  
詔示想宜知悉

幸學詔

淳熙四年二月五日

勅昔我藝祖肇造帝室禮樂征伐猶未遑暇乃開基之

月首幸國學越二月又幸既宏先聖先師之宇復審象  
而爲之贊本原治道厥有深旨然則掃五季之陋削諸  
侯之僭垂萬世之統不在斯文乎列聖相承遂爲家法  
太上中興開設學校乘輿臨幸儒術益光肆朕纂圖儲  
精稽古憲章祖述夙夜不敢忘爰以仲春謁款將聖躬  
釋菜之禮闡中庸之義臣工侍列多士濟濟洙泗遺風  
儼然在目朕甚嘉之明揚訓辭尚迪朕志夫孝於事親  
忠於事君學之本也業精於勤行成於思學之序也聖

賢復起不易斯言子大夫其念哉當為君子之儒毋慕  
人爵之得使予尊德樂道之心著化民成俗之效行光  
于祖宗對於慈訓斯無負於樂育在汝等勉之而已故  
茲詔示想宜知悉

繳奏

臣昨日於龔茂良李彥穎處恭聆聖訓令臣撰幸學  
詔書內用當為君子之儒毋專人爵之得兩句臣尋  
具草進入緣一時耳受不審以專為慕今準御筆始

知其訛欲候批降草本至院即改正修寫伏乞睿照  
御筆摹字尤工更不須改

舉賢良方正詔

淳熙四年三月十日

勅門下朕惟乾德興邦咸平熙載天聖御圖之始紹興  
復古之初皆設制科博詢讜論肆予涼德欣慕前規茲  
當貢舉之秋仍下方聞之詔翹翹其楚冀賢雋之無遺  
謬謬而昌抑邦家之有賴咨爾閨臺之彥暨夫嶽牧之  
官或薦進於中朝或搜揚於外服俾攄所蘊陳古今致

治之原將策於廷振臣庶敢言之氣毋借才於異代庶  
復德於我家布告多方明知朕意今歲科場其令尚書  
侍郎兩省諫議大夫以上御史中丞學士待制各舉賢  
良方正能直言極諫一人守臣監司亦許解送仍具詞  
業繳進以聞故茲詔示想宜知悉

戒飭諸路轉運司手詔

淳熙六年三月二十四日

朕躬節儉以先天下無暴征無苛取期我元元躋於富  
庶之域郡國之間宜若公私交裕矣今顧不然豐年樂

歲中外少事或未免於匱乏州迫其縣縣迫吾民其故  
安在無乃賦入寡而用度衆歟吏二千石有能不能歟  
將輕費妄用莫知撙節歟朕深居九重無以徧察故分  
道置臺寄耳目於爾漕臣職當計度欲其計一道盈虛  
而經度之也職在按察欲其蚤正素治毋使至於病民  
也厥或異此朕何賴焉且汝不聞黍苗之詩乎我任我  
輦我車我牛謂美召伯能成轉輸之功也後世以是名  
官寧無意耶曰陰雨膏之言能養民如膏雨也其卒章



曰王心則寧言家給人足乃能安王之心也汝等得不  
深思古誼視所部為一家周知其經費而通融其有無  
廉察其能否而裁抑其耗蠹數者備矣郡計何患乎不  
足郡計足則屬邑寬屬邑寬則民力裕民力裕則吾宵  
旰之慮釋國有信賞於汝何吝若乃有餘者取之不足  
者聽之逮其乏事然後從而勅之斯亦晚矣是則黜罰  
之行奚獨郡守而已諸道轉運其明知朕意

繳進詔草劄子

臣昨因奉宣引嘗忘奏朝廷責財計於諸路諸路責財計於州縣上下通融當如一家此不易之理也今顧不然朝廷督諸路轉運使不過常賦爾未嘗有所橫取也而為漕臣者間有不能仰體德意竭州郡之力而弗恤此何理也夫謂之計度轉運是欲其斡旋一路財計使之有無相通也居是官者奈之何略不究此臣不暇遍舉只論去年數月之間紛紜者三單夔以侍從典輔藩綏不支歸正人添給通衢之中扯裂車帷永州守臣徐

樞初授代日歸正及添羌揀汰人相率攔轎醜詆知南  
劍州林栗在任丁憂亦為添羌人等妻女詬厲夫二千  
石尊重難危緩急乃可彈壓若使其下常懷忿嫉伺間  
而侵侮之國家間暇不過少失事體而止萬一疆場或  
駭征伐於外其弊則將若何比來朝廷雖量貶守臣懲  
治無賴然臣謂齊其末不若治其本何也俸料不支無  
以養生此小人所以不遜也財用匱乏支遣不繼此守  
臣所以束手也臣常深思州用匱乏之由盖有三說一

則地瘠民貧入寡出多不可措置二則郡守閭閻滲漏者衆不能措置三則輕費妄用不暇措置為漕臣者貧當濟之閭閻者當策勵之妄費者當戒約之甚則劾而免之夫然故有曲突之功而無噬臍之患今平居一切聽郡守之所為聞其小有盈餘又為豪奪巧取之計一遇生事亟劾守臣以自解所謂計其有無度其盈虛者當如是乎臣願陛下戒飭諸路轉運使俾之各思其職宣朝廷之惠澤視州縣為一家上下通融早正素治勿

為苟且趣了目前蓋上下通融則州郡稍寬州郡稍寬則諸縣不敢橫斂縣不橫斂則民力稍裕當今急務孰有大於此者伏蒙陛下聖明洞照深以為然今擬撰詔書令某具稿進呈未知辭意穩當否伏取進止

記

淳熙五年

選德殿記

皇帝踐祚以來宮室苑囿一無所增修獨闢便殿於禁

垣之東名之曰選德規模樸壯為陛一級中設漆屏書  
郡國守相名氏羣臣有圖方略以上可採者輒棲之壁  
以脩觀覽數延文武講論治道詢求民隱至於中外奏  
報若軍國之幾務皆於此省決暇則紬繹經傳或親御  
弧矢雖大寒暑不廢臣某俟罪禁林間嘗奉詔獲至焉  
一日命臣汝為之記臣愚學不足以推廣聖意詞不足  
以鋪陳盛美謹采詩禮古文以射觀德事及後世得失  
所由次第其說禮君世子生三日射人以弧矢六射天

地四方其早正素定若此至擇士以祭必於射也進退  
天下之才與祭者由是得為諸侯卿大夫若屬有賓客  
之事燕勞之寵莫不用射詩人又於其獻酬歌嘏之餘  
中度不中度罰爵與否有所休戚美刺以為是王公大  
人風化黎庶者之本也由是觀之古者君臣周旋禮樂  
以服習勤苦可不謂先事知懼安而能危者哉是故三  
代而上卿士皆可獨將而兵民為一式不生心世用底  
定比其季也徒以為威儀觀美而實不副馳騁弋獵而

政不舉則國人為之隱憂而變風作其後王道浸缺而文武兵農遂分而不合自秦漢而下其興衰治亂鮮不以兵一夫關弓注矢則塗之人往往膚驚兔逸之不暇烽燧纔舉而卿大夫至無可使未免拔將於行伍之中何者其具素亾也天錫陛下勵精百世之後追踪太古之初謂射本男子之事非專於用武也射所以觀德非專於覲威也故為是殿以延羣臣以裁幾務以閱圖史而命名則主乎射焉起居日用之間既已默示躬行之



旨宜乎小大之臣與夫四方萬里之遠循其理思其義  
觀感而化從上攸好勝負之爭而揖遜之寓勇力之尚  
而仁義之貴閑邪安於真積習慣同乎自然可以興賢  
能可以詢衆庶合兵民於已判同文武之異轍將於  
是乎在昔者宣王中興其詩曰射夫既同助我舉柴序之  
者曰是小雅廢而復古之詩也蓋治有先後功在不舍  
沈潛剛克時乃天道陛下神聖必於此有得焉而臣何  
足以知之臣謹記

此記淳熙戊戌閏六月十四日進呈於倚桂殿至九月五日上遣中使李裕文携至所居宣旨令寫進欲刻之石蓋留禁中八十日往往黏寘屏間其跡尚存臣某謹記尋命修內司石工張雋刻石十一月十日立於殿上

進選德殿記奏

九月六日

臣昨日承中使李裕文傳奉聖旨令臣書所撰選德殿記進入臣文詞鄙野字畫不工勉遵明詔實深震

懼謹具劄子繳進伏望聖慈恕其冒昧臣不勝屏息  
俟命之至

謝御書劄子

十一月二十五日

臣適蒙聖恩召至選德殿面賜訓諭欲以御書光寵下  
臣尋準中使李裕文傳示聖旨頒賜唐白居易七德舞  
七德歌一軸龍蟠鳳翔眩駭凡目仰惟皇帝陛下睿文  
英武同符太宗選用將相內修政事將欲定兩京致太  
平故有感於居易之言形諸翰墨少見聖意抑臣何幸

乃祇拜此賜者本朝太宗皇帝以宋玉大言賦賜蘇易簡哲宗皇帝以白居易紫薇花詩賜蘇軾皆以寵待詞臣垂光簡冊今臣榮遇殆且過之謹當什襲珍藏傳示子孫侈遭逢之盛其於報塞惟誓靡捐謹具手劄奏謝伏乞睿照

進謝御書古詩

臣伏蒙聖恩賜臣御書白居易七德舞樂府一軸天光貴飾節室輝華臣榮感之餘謹用蘇軾謝御

書居易紫薇花絕句故事齋沐課成古詩一篇少  
見戴恩之意輕瀆宸嚴伏地俟罪某官臣周某某上

進

允文元祐詞臣軾勁節名章世無敵御前曾賜紫薇  
詩袖裡驪珠光的皦小臣謬直白玉堂也紆皇眷摛  
雲章雲章元是七德舞字字筆法超鍾王兩朝相望  
九十祀長慶集中偏屬意咸池日照草木光天門龍  
躍魚蝦悸我皇英銳真太宗文武神聖功德隆黃鉞

指期擒頡利捷書先獻大安宮元和學士白居易臣  
非其才私有志願隨班賀四海清續唐之歌誇萬世

跋御書

淳熙五年十一月甲申臣逖直禁林中漏上三刻蒙

宣召至選德殿有中使諭旨云內翰所作殿記

上燕見多

呼官詞義甚美令刻石立殿上特命觀覽讀已趨至後

幄上而南坐起居畢詣榻前再拜謝天音獎諭如初  
因泛論三代以來人君知道與否遂評六經諸子下

至道釋精粗累數百言臣偶及聖人之言異乎賢人  
即訓臣曰聖賢氣象廣狹極相遠如孔子謂飽食終  
日無所用心不有博奕者乎為之猶賢乎已至孟子  
則云人飽食煖衣逸居無教近於禽獸夫人為萬物  
之靈安可輕比禽獸又論易繫辭復數百言皆老生  
宿儒沒世窮年晝思夕讀所不能至者臣第知俯首  
傾耳服膺而已將退命坐賜卮酒侑以時果飲醕欲  
興復宣坐賜茶上曰待以惡札賜卿

聖語不敢易  
以著謙德

臣

頓首稱謝薄暮歸院而奎畫隨至蓋書白居易七德  
舞一軸鸞翔鳳騰體脩八法鍾繇義獻方之蔑矣其  
後仍注賜必大三字加御寶焉朱墨猶未乾也臣伏  
思元祐中太宗皇帝嘗書居易紫薇花絕句以寵學  
士蘇軾今臣亦拜樂府之賜雖庸愚不肖視前人無  
能為役然兩朝相望殆且百年聖心所屬其揆則一  
意者以居易為元和學士時非特文字過人而忠純  
諒直自能光明厥職後世惟軾為無愧故欲下臣師



慕兩賢之萬一以為報答效歟臣既摹刻之石俾有  
目者咸仰聖天子游藝入神動存至戒又略記謨訓  
於後使萬世而下知聖學淵懿仁民愛物高出帝王  
之表蓋如此若夫陛下功德兼隆同符太宗天下將  
誦而歌舞之固非臣謏訥所能宣也翰林學士中奉  
大夫知制誥兼侍讀兼太子詹事兼修國史管城縣  
開國子食邑五百戶賜紫金魚袋臣周某謹記

序

淳熙六年

論文海命名劄子

臣準省劄脩奉聖旨以呂祖謙編類到聖宋文海令臣  
撰序臣仰惟陛下當宵旰勵精規恢大業日不暇給之  
際猶以餘力垂意本朝名士之著述特命館職精加採  
取類為一書將與文選文粹並傳永久其加惠於斯文  
甚厚臣雖骫骳不才無以序前人所為作者之意然叨  
塵詞禁恭值陛下觀乎人文以化成天下紀事之端固

其職也但臣伏思文選文粹者皆以精擇為義而江鈿所編頗失之泛故其命名有取於海今若襲而用之似未足以仰副隆指謂宜出自淵衷別賜一字以詔來世或恐不必上勤肆筆即願令宰執商量擬進仍以皇朝二字冠其上用示悠遠無疆之意臣當推廣聖意擬述序引恭俟制旨臨定伏取進止

繳進文鑑序劄子

臣近者恭奉聖旨撰皇朝文鑑序臣竊惟聖朝文章之

盛遠過前代陛下既命採擇其菁華仰以脩乙覽俯以  
幸學者宜有高文為之序引以敷達聖意而臣適在翰  
苑猥當執簡聞見淺陋語言荒蕪勉塞明詔無所逃罪  
其序文今已撰成謹錄封進臣無任慚惶兢懼之至取  
進止

皇朝文鑑序

臣聞文之盛衰主乎氣辭之工拙存乎理昔者帝王之  
世人有所養而教無異習故其氣之盛也如水載物小

大無不浮其理之明也如燭照物幽隱無不通國家一  
有殊功異德卓絕之跡則公卿大夫下至於士民皆能  
正列其義餽飾而彰大之載於書詠於詩略可考已後  
世家異政人殊俗剛大之不充而委靡之習勝道德之  
不明而非僻之說入作之弗振也索之易窮也譬之盪  
舟於陸終日馳驅無以致遠搏土為像丹青其外而中  
奚取焉此豈獨學者之罪哉上之教化容有未至焉爾  
時不否則不泰道不晦則不顯天啓藝祖生知文武取

五代破碎之天下而混一之崇雅黜浮汲汲乎以垂世  
立教為事列聖相承治出於一援毫者知尊周孔游談  
者羞稱楊墨是以二百年間英豪踵武其大者固已羽  
翼六經藻飾治具而小者猶足以吟詠情性自名一家  
盖建隆雍熙之間其文偉咸平景德之際其文博天聖  
明道之辭古熙寧元祐之辭達雖體制互興源流間出  
而氣全理正其歸則同嗟乎此非唐之文也非漢之文  
也實我宋之文也不其盛哉皇帝陛下天縱將聖如夫

子煥乎文章如帝堯萬幾餘暇猶玩意於衆作謂篇帙  
繁夥難於徧覽思擇有補治道者表而出之乃詔著作  
郎呂祖謙發三館四庫之所藏裒縉紳故家之所錄斷  
自中興以前彙次纂上古賦詩騷則欲主文而譎諫典  
策詔誥則欲溫厚而有體奏疏表章取其諒直而忠愛  
者歲銘贊頌取其精慤而詳明者以至碑記論序書啓  
雜著大率事辭稱者為先事勝辭則次之文質備者為  
先質勝文則次之復謂律賦經義國家取士之源亦加

采摭略存一代之制定為一百五十卷規模先後多本  
聖心承詔於淳熙四年之仲冬奏御於六年之正月賜  
名皇朝文鑑而命臣為之序臣待罪翰墨才識駑下固  
無以推原作者闡繹隆指抑嘗竊讀大雅之詩而知祖  
宗所以化成天下者矣棫樸官人也旱麓受祖也辭雖  
不同而俱以遐不作人為言蓋魚躍於淵氣使之也追  
琢其章理貫之也況夫雲漢昭於上豈弟施於下濟濟  
多士其有不觀感而化者乎是則祖宗啓之陛下繼焉



樂文王之壽考申太王王季之福祿人才將至於不可  
勝用豈止乎能文而已臣雖不肖尚當執筆以頌作成  
之效云臣謹序

文忠集卷一百四

欽定四庫全書

文忠集卷一百五

玉堂類稿五

宋 周必大 撰

賜臣僚請免詔一

乾道六年

賜顯謨閣直學士左朝議大夫知潭州沈介乞

守本官職致仕不允詔

七月二十四日

卿以剛毅之資通明之略填臨一道威望隱然當今謀

帥未有能越卿者也胡為引疾遂致為臣年至耶力不足耶卿何詞之切去之果也夫卑濕重膇江南之常獨長沙乎其思嗇精神宣底滯靖共介福何恙不已爾庸既茂方且圖之所請宜不允

賜端明殿學士左中奉大夫知平江府汪應辰

乞除一宮觀差遣不允詔

八月七日

朕宵旰圖治所賴以宣布德澤者繫良二千石是望既延見訪問以精擇於初又增秩賜金以久任於後凡以

為民也如卿豈弟忠信侍朕有年德意志慮宜知之矣  
出臨吳會曾未數月民隱甫恤吏姦甫戢上書求去其  
義安在夫守方賢而遽易固非朕指政垂成而輒棄卿  
亦奚取此哉姑安厥官慰彼黎庶

賜敷文閣直學士降授左朝請大夫晁公武辭  
免知揚州恩命乞除在外宮觀不允詔八月

卿昔任言責廣朕聰明旋陟民曹叅予侍從渡瀘鎮益  
又乞外庸萬里召歸固當留以自近會江浙擇牧思得

卻敕詩書之帥羊祜威信之守茲為重寄今以付卿謂  
宜疾驅以寬憂顧數上祠請非予所知

賜右朝議大夫曾懷辭免除龍圖學士知婺州

恩命乞一宮觀差遣不允詔

八月二十二日

久勞暫逸者臣子之至情入從出藩者朝廷之異數既  
進退之無愧宜恩榮之有加卿自寅周行即司邦計深  
達通變之術兼明取予之方六年於茲多績用懋曳履  
正資於獻納需頭屢丐於退閒冠西清嚴近之班付東

道蕃宣之寄裕民足國已晞晏巽之功宣化承流尚跂  
龔黃之政悉心思報避寵何名

賜左中奉大夫行司農少卿韓彥直辭免特換

觀察使知襄陽府恩命乞許以舊官任使不

允詔

同前

廉車本唐十道採訪之官初無文武之別也祖宗時錢  
若水以執政舊臣王嗣宗以中司峻望李維以禁林舊  
德皆易此官中興以來嘗有自次對而得者當時猶謂

之優焉今朕以卿智略疏通性資靜重徧更外計綽著  
多庸故由列寺介卿特加超拜槩之近比寵數愈優峴  
首被邊號為重鎮往宣威信勿事謙辭所請宜不允

賜徽猷閣直學士左朝請郎知太平州周操辭  
免改差知泉州恩命乞改除一宮觀不允詔

八月二十五日

卿公忠端亮久簡朕心豈弟廉勤數騰郡最以明而陟  
改鎮大藩既答民庸且彰異眷引年罷守本抑常材若



夫政績著聞風猷克壯則雖庶僚有不得去者矣况吾法從之儻老哉卿其勿疑亟服新命

賜徽猷閣直學士左朝奉大夫周操再辭免知

泉州及奏事恩命乞改除一宮觀差遣不允

詔 九月十六日

卿以侍從之良而名在諸侯之選易州趣覲蓋將聞嘉猷詢民瘼也而卿前既引年今復辭疾殆異乎國體之誼矣其重賜璽書以著予意匪常禮也朕於卿簡眷如

此卿得不為朕一行乎

賜左正議大夫蔣芾再辭免新除觀文殿大學

士知紹興府恩命不允不得再有陳請詔

成王之封召伯憇南國而教明康王之命畢公釐東郊而道治皆藉大臣之望用彤九牧之風今朕起卿寔惟稽古開近畿之鉅鎮加秘殿之大名素冠樂樂矧終於禮制赤舄几几佇見於儀型何未喻於眷懷乃游披於遴讀具遵初詔允廸前良

賜觀文殿大學士左光祿大夫知福州陳俊卿

乞改除一在外宮觀差遣不允詔

十月

朕待舊弼之禮甚厚擇帥守之任甚艱屬者以四千石之重俾卿畫繡而歸豈特敬故保庸合周官八統之馭亦惟七閔父老子弟知吾以相臣為封部之寵庶幾歆羨告語勉於為善則一道雖遠可不勞而治也謂體此意往綏厥官諗疾之章何為遽上傳曰不使大臣怨乎不以況我潛藩之故舊乎卿未可以家食也

賜徽猷閣直學士左朝奉大夫新改差知泉州  
事周操乞除改宮觀差遣不允詔

朕惟泉南大藩遠在閩徼遴擇師帥莫如卿宜而懇避  
之章一再不已昔卿未至引疾可也今既見朕矣精力  
之強不異曩時其可遂卿雅志乎勉為朕行毋數勤詔  
諭也

賜觀文殿學士左宣奉大夫提舉臨安府洞霄  
宮魏杞辭免差知平江府恩命不允詔

朕觀唐虞之世內有百揆四岳外有州牧侯伯故能和  
庶政而寧萬國今朕起弼諧之舊任藩宣之寄用此道  
也惟卿令德孝恭繼君陳之美威儀維則有魯侯之風  
吳門大邦密邇王室蓋精擇而後用豈謙辭所能避哉  
亟其來思惠此千里

賜左朝散郎試中書舍人兼侍講兼直學士院  
鄭聞辭免新除禮部侍郎依舊兼直學士院  
恩命不允詔

朕惟秩宗典樂舜命二人成周雖合於春官然大宗伯大司樂亦分二職今儀曹兼掌斯事任加重矣朕既置其長復立其貳倣古誼也卿以通才與學嘗摠夷夔之職粵司名命益為國華庸正貳卿俾續前業顧郊裡密邇禮樂之用為急使朕接三神之歡成一代之典正有賴於博洽而又何遜焉

賜敷文閣直學士右承議郎知明州兼沿海制置使趙伯圭乞除一在外宮觀差遣不允詔

十月五日

朕聞太守吏民之本數易則下不安故雖邀方支郡猶擇人而久任况近畿鉅藩控制海道如四明者乎卿大雅不羣居官可紀再分符竹治效益彰謹身帥先如文翁之守蜀足用愛民如僖公之保魯父老方借留不釋而朕輕許其去可乎毋棄爾成以究循吏之績

賜左朝請郎試尚書戶部侍郎江浙京湖淮廣福建等路都大發運使史正志乞守本官職

致仕不允詔 十月五日

朕廼者發官以示四方庶幾大易理財之義虞書養民之政復見今日卿由侍從首在選中亦既宣勞方期底績乃因奉計遂欲告歸是豈朕責成之指哉傳不云乎禮義不愆何恤於人言卿其平心審思使國用足於上民力裕於下稱朕意焉所請宜不允

賜復威武軍節度使左金吾衛上將軍李顯忠  
辭免除主管侍衛馬軍司公事命不允詔十



月十五日

國以兵益強兵以將為命況夫搃爪牙於圻父憲羽林之壘壁委寄至重可輕授人卿沈毅忠勇見今名將紹興之末嘗典騎軍自朕纂承益加倚信與其執戈環衛宣夙夜之勞孰若申命天營觀訓齊之效衆論惟允卿毋固辭

賜左正議大夫守尚書右僕射虞允文辭免轉一官加食邑一千戶食實封四百戶恩命不

允詔 十二月三十日

勅允文省所劄子奏辭免提舉刪修勅令書成特轉左  
正奉大夫加食邑食實封恩命事具悲宰以六典佐王  
周室乃成於邦治相以九章約法漢家遂協於時宜惟  
大臣克念於兼三則多士自遵於畫一眷予賢弼力蹈  
前修致君已展於謀謨定令更陳於綱紀成書來上一  
覽甫周進階特獎於多庸加地更隆於異數既廷揚之  
衆允矧面諭之素孚毋費謙辭趣承寵命所請宜不允

賜左承議郎權尚書工部侍郎兼侍講胡銓辭

免除工部侍郎恩命不允詔

十一月二十一日

汲黯在漢謀寢淮南隨會仕晉盜奔秦境本朝尊用吉士分治六職庶幾逆折姦萌而使幸民退聽非必專以事諉也如卿堅強肅括輔之文學忠言竒論老而不衰再儀周行侃然從近臣之後朕每嚮焉就正貳卿蓋優宿望卿其益勵壯志自同古人副朕所以眷待之意尚何辭之有

賜尚書右僕射虞允文辭免提舉詳定一司勅

令恩命不允詔

十一月二十六日

周太宰以法待官府之治繫之天官今朕欲仍舊貫講明百司之法而自公府及吏銓始蓋古之遺意也卿以經術斷國論賢業熙帝載提綱於此位實值才傳曰三公佐天子平邦國無所不統卿乃以總他職為辭無乃異乎况朕稽用已行之典高卿相遜之風特詔克家貳其事矣協謀合慮亟成新書庶幾乎成周不其休哉

賜參知政事梁克家辭免兼同提舉詳定一司

勅令恩命不允詔

法令者治之具也朝廷者百官之表也惟憲度著明於上則紀綱不紊於下今朕復故事定章程始於臺省達於有司蓋將為一代不刊之典非吾執政誰與議此卿以儒猷久飾王度以智謨參穆天綽與提綱領允謂當仁而況並命宰輔非特天聖以來為然在紹興時或以疑丞或以宥密視諸故府具存近規出位為辭非所望於

卿也所請宜不允

賜皇子雄武軍節度使開府儀同三司慶王愷

辭免加食邑食實封恩命不允詔

日十二月九

朕乃者躬執珪幣郊見上帝誠意昭格風雨時若美光  
休應集於中壇方推大賚以及四海况我父子之親真  
王之貴重嘉觴之獻殫駿奔之勞允所謂溫恭朝夕執  
事有恪者也其何愛多戶之封不以廣龐鴻之施乎夫  
慶賜之行自親以及疎由貴以及賤此先王之典也可

無復辭所請宜不允

賜觀文殿大學士左光祿大夫知福州陳俊卿  
乞改除一在外宮觀差遣不允不得更有陳

請詔

同前

民惟邦本本固邦寧岳牧之官其敢不重近者起一二  
舊相鎮臨藩服庶幾倡率郡國與我共理如卿早傳潛  
邸徧儀邇列比辭宰事寵畀帥權因畿輔之久則志易  
孚順故鄉之俗則政易治朕方嘉卿夙夜匪懈不以大

紳自居推我惠心致之閩嶺而曾未暮歲求去者再甚  
無謂也昔汲黯多病猶能卧治東海卿其可以微疾為  
辭乎况朕推誠無疑篤股肱之舊而卿何不自信引桑  
梓之嫌姑安厥官毋替朕命

賜左中大夫參知政事梁克家辭免進封清源  
郡開國侯加食邑食實封恩命不允詔

朕承天命之序饗帝於郊不敢恃犧牲黍稷之豐而所  
竭者誠不敢矜玉帛鼓鐘之備而所修者德荷神靈之



昭格慶典禮之備成丕擁純禧徧敷黎獻卿勵志許國  
同寅惠疇匪惟講明三歲之彌文寔亦啟迪一純之精  
意相予肆祀具宣登降之勞賚我思成宜共休嘉之福  
封徹侯於故郡陪多賦於上腴鴻需所加朕豈有徒施  
之惠顯庸斯稱卿固無虛受之嫌其體眷懷勿堅冲尚

賜皇兄檢校少保岳陽軍節度使開府儀同三

司充萬壽觀使永陽郡王居廣辭免加食邑

食實封恩命不允詔

十二月十四日

朕誕受帝祉敷錫中外以王屬近位高在顯相之列均  
釐加地其說蓋有三焉親親仁也貴貴禮也富善人義  
也制書既下可以謙辭而中格哉

賜太尉保信軍節度使充萬壽觀使鄭藻辭免  
加食邑食實封恩命不允詔

郊廟廣矣無親疎無大小內外咸暨一焉卿地則懿戚  
位則掌武祿則祕祠此固慶澤所宜先者矧朕親駕郊  
廟之夕卿實宿衛宮省使吾不內顧而盡敬於酌獻厥

功茂矣其可辭賞乎

賜左朝議大夫黃中辭免除顯謨閣學士在外

宮觀恩命不允詔

十二月二十二日

朕以卿有次公之溫良叔度之深遠直諒多聞昔為益  
者之三友爵齒有德今號天下之達尊故起之既老幾  
以自近而卿深惟止足之義重於朝請之勞數上書求  
去朕不得而留也文謨峻職真祠厚祿不如是無以旌  
朱邸之舊遂赤松之遊常格云乎哉所請宜不允

賜皇弟少保靜江軍節度使判大宗正事恩平

郡王璩辭免加食邑食實封恩命不允詔

同前

朕乃者迎日之至三修郊類戰戰兢兢懼無以承天地之況合祖宗之心而假廟之夕象載昭察升燎之際衆星留俞顧朕不明其何以臻茲亦惟爾王公卿士秉德助祭之效也詩不云乎豈伊異人兄弟具來胙祉所加孰先同姓抗章辭邑非體朕親睦之意也

賜昭慶軍節度使致仕劉懋辭免加食邑食實

封不允詔

十二月二十六日

朕歌成命之頌而殫夙夜宥密之心詠思文之章而懷  
立我蒸民之德精神亨達瑞應紛委斂敷慶澤中外胥  
及粵吾一二告老之臣名在戚里家擁旌節可獨遺乎  
夫均惠所以推天地之况篤舊所以廣祖宗之仁事異  
勸勞朕非以是私卿也

乾道七年

賜皇弟璩再辭免加食邑食實封恩命不得再

有陳請詔

正月三日

朕峻丘澤之祠篤邦家之慶並崇冊寶尊我庭闈加錫  
金縉惠於文武惟時介弟慕昔賢王率麟趾以駿奔服  
貂冠而顯相拓其奉邑壯乃宗盟均福展親義可承而  
難避執謙辭富章既却而復來雖諒忱言莫回汗渙所  
請宜不允不得再有陳請

賜龍圖閣直學士右朝議大夫知婺州軍州事

曾懷乞除一在外宮觀不允詔

正月十日

卿心計有餘而能以損下益上為戒當今理財殆未有  
出卿右者拜州累月朕注想焉驛召而來將復付以足  
國裕民之寄其可言去乎勉悉爾心即頒寵命所請宜  
不允

賜右中大夫充徽猷閣待制新除知荆南府姜  
誥辭免除敷文閣直學士恩命不允詔 正月

二十五日

卿宣城之政號稱勤敏當積潦之後有振廩之功可稽

陟明以勸能吏矧祖宗甚重邊帥率進職以寵其行今  
吾荊州蔽巴蜀控襄漢帶沔鄂任加重矣可無褒乎西  
清進班所以錄前勞責新組也尚體至意毋為遜辭所  
請宜不允

賜龍神衛四廂都指揮使廣州觀察使趙樽再  
辭免除昭化軍承宣使恩命不允不得更有

陳請詔

正月二十六日

卿守邊日久軍政修明進階承流庸以示勸此六年正



月之詔也今彌歲矣乃上章固避至七八而未止是豈稱朕急於第功之意哉面諭已孚亟恭前命

賜復慶遠軍節度使差充鎮江府駐劄御前諸軍都統制成閔辭免加食邑食實封恩命不

允詔 二月二日

朕籲俊以尊上帝非惟常伯常任是賴亦惟虎賁之長越在外服簡恤爾士尚迪果毅以登乃辟肆予一人汝嘉用承天休賚爾多邑誕告有衆咸曰允哉毋或

固辭共朕之詔所請宜不允

賜皇子鎮洮軍節度使開府儀同三司恭王某

辭免立為皇太子恩命不允詔

二月九日

朕觀夏商而後唐漢以還率當國家閒暇之時預進社稷久長之策古以為重朕安敢輕以汝符采昭融性資英敏早辨南陽之牘深窮東序之經素簡朕心灼知厥德用協本朝之茂憲載行至道之盛儀詔以揚庭命之貳極蓋兼採親賢之望顧豈專父子之恩永肩忠孝之圖

勿徇謙冲之節

賜成閔上表再辭免加食邑食實封恩命不允

不得再有陳請詔

二月十八日

王者公子奪以馭臣人臣明辭受以事上古今之通誼也日朕躬郊拜况均惠文武有懷宿將摠戎於外雖無侍祠之勞而有制閫之功載加多邑以溥吾恩非妄予也卿其可異衆而獨辭乎所請宜不允不得再有陳請

賜龍神衛四廂都指揮使宜州觀察使主管侍

衛步軍司公事王友直辭免陞侍衛親軍步

軍都指揮使恩命不允詔

二月二十一日

朕謹操八柄以馭羣臣凡厥賞刑眎夫功過卿治軍有  
律事上不欺顯示朕恩就升使範既為爾寵亦勸其從  
宜即欽承勿勞遜避所請宜不允

賜皇子魏王愷再辭免依文彥博例宴餞於玉

津園恩命不允詔

二月二十四日

昔宣王能錫命同姓詩人美之曰韓侯出祖出宿於屠

顯父餞之清酒百壺此中興盛禮也今吾真王之貴分  
近輔之符百籩郊餞所以敦天性示慈惠也稽之在昔  
恩禮愈隆尚其拜嘉光乃行邁

賜左中大夫參知政事四川宣撫使王炎乞罷  
機政并解使權除一在外宮觀差遣不允詔

二月二十八日

卿以廊廟之資置行臺於蜀二年於茲矣農田有秋邊  
鄙不聳朕固寬西顧之憂而亦懷卿賦東征之歸也特

以宣威任重謀帥才難煩我近弼良非獲已且民心既服卿豈不欲圖其寧軍政方修卿豈不欲底厥績其可如一介之臣輕議去就乎益壯爾猷行受吉甫之多祉

賜利州觀察使韓彥直辭免除鄂州駐劄御前

諸軍都統制恩命不允詔

二月二十八日

唐之雅曰惟西平有子惟我有臣將門擇將自昔然矣惟乃先著勲列於王室世選爾勞庶其在茲矧卿智略聲猷見於總賦之日就拜大將一軍何驚焉勉圖功名

安用辭避

賜叅知政事梁克家辭免兼權知樞密院事恩

命不允詔

三月十一日

卿醇明通達夙被簡知自陟政塗即迭貳鈞樞之任朕  
意亦可見矣迺者特起舊人通知兵柄卿是以有前日  
之請然而籌帷之官尚或虛位朕是以有翼日之詔蓋  
控辭者卿之志也申命者朕之本心也既已兩得奚為  
自疑

賜皇太子辭免立妻李氏為皇太子妃不允詔

三月三日

朕居念永圖動遵成憲知子莫若父既毓德於春闈治國先齊家復正名其嘉耦蓋禮容之異數則位序之同升國有榮懷往無辭避

賜定國夫人李氏辭免立為皇太子妃不允詔

三月三日

朕觀易象以正家人玩禮經而明內則眷時令婦久嫔



嗣賢既靜順以脩身亦虔共而佐餒茲宏開於儲禁爰  
並錫於徽章允協舊規盡蠲冲節

賜明州觀察使張說辭免除安慶軍節度使提  
舉萬壽觀加食邑食實封恩命不允詔

卿久在樞庭日承密旨邊防軍政既與聞之比名超遷  
其實因任顧乃逡巡辭位莫得而留畀之將旌優以祠  
廩既曲從於卿志亦罔拂於師言朕於邇臣可謂進退  
有禮矣卿猶固避不已過乎

賜觀文殿學士左宣奉大夫知平江府魏杞乞

除一在外宮觀不允詔

三月二十六日

朕愛民甚所賴於惠養而訓道之者不在良二千石乎卿以孝友忠信宣慈明允起臨近輔庶達朕心既勤勞於初當優游於後十旬遽去人謂斯何仲弓曰居敬而行簡以臨其民允蹈格言迄成靜治所請宜不允

賜草土劉珙辭免起復除同知樞密院事恩命

不允詔

同前

卿文武憲邦朕所注想屬聞罹親憂釋閭寄朕未忍下  
奪情之詔者知卿送終之心切也今卿哭踊有節少抑  
門內之恩寵宥無違足伸人子之孝起任吾事茲其時  
乎况當朕焦勞之秋欲咨卿軍旅之務從權合禮何名  
教之虧移孝而忠何風化之薄勉興塊次來贊前籌所  
請宜不允

賜顯謨閣學士左中奉大夫知渾州沈介辭免

召赴行在乞改除一宮觀差遣不允詔

同前

卿清明敏達輔之學術蓋國家之寶臣也往者藉其才  
付以方面今者閔其勞命之來朝朕待臣工亦云至矣  
卿久去侍從獨不思奉三年之計且告我以嘉謀嘉猷  
乎抗章辭行非不俟駕之義也佇前朕席宜疾爾驅所  
請宜不允

賜觀文殿大學士左正議大夫知紹興府蔣弼  
再上劄子乞除一在外宮觀差遣不允詔三

月二十八日

卿德善在躬寬而有制比席衮衣之貴懷會稽之章布  
宣恩威人以畏慕薦求自佚殊拂朕心惟爾高曾暨乃  
祖乃父或以方略為帥或以廉清號良守推爾家法又  
吾軍民豈惟予一人以寧時亦昭乃世德尚體茲意毋  
勤再三

賜敷文閣直學士王十朋辭免除太子詹事恩

命乞依舊奉祀不允詔

四月五日

朕深惟三代長久之道豫建太子又擇名卿宿儒為之

衛翼所以尊宗廟重社稷也卿清明諒直海內寡二頃  
由三館以經術從吾兒遊茲啓承華命居端尹是資正  
論益廣前聞卿疾既平強為我起所請宜不允仍依已  
降指揮疾速前來供職

賜福州觀察使提舉佑神觀曾覲辭免特與轉

行一官恩命不允詔

四月七日

惟予賢子昔在幼學春誦冬讀詔之有人逮茲升儲隆  
我國本推恩篤舊厥有故常按籍序遷卿其一也理無

可避往即欽承

賜左中大夫參知政事四川宣撫使王炎上表  
再辭免進封清源郡開國侯加食邑食實封

恩命不允不得再有陳請詔

四月十二日

朕廼者不愛牲玉躬秩元祀於穆清廟時則來多士之  
助敬事上帝時則有三俊之功慶賜所加遠邇如一眷  
言哲輔為朕倚毗賦政於外方資山甫之喉舌用錫爾  
祉宜廣召公之土田惟君命之不可稽惟神釐之不可

拒遠勤遯牘殊哂予心所請宜不允

賜左中大夫給事中王暉辭免除翰林學士

命乞除一在外宮觀差遣不允詔

同前

卿早由推擇進直搗文出入禁塗今二十載非特詞章之麗素簡朕知至於官簿之優誰居卿右逮茲顯拜寧復間言况朕臨御以來用內相纔數人耳一時髦士預選為榮三入承明在卿尤寵方觀鴻筆宜略撝章所請宜不允



賜敷文閣直學士左朝議大夫知揚州晁公武

辭知潭州不允詔

四月十三日

勅公武省所劄子奏辭免改差知潭州恩命乞檢會前  
奏除在外宮觀事具悉長沙昔稱都會連帥今總兵民  
生齒夥繁夷獠被邊自非仁以撫之義以制之其不乏  
吾事者幾希卿屢劄州符三分間計政適寬猛在循吏  
之目孔子曰如有所譽其有所試卿於宅牧可謂詳試  
矣朕命維允爾行勿遲

賜敷文閣直學士左朝議大夫知揚州充淮南

東路安撫使晁公武乞除外宮觀不允詔

四

月十五日

朕勵精庶政夙夜不敢康亦惟州牧侯伯推惠澤而致之民以協贊予治卿奮由儒術見謂吏師服在近班數更守帥疇庸淮海易鎮湘流甫下璽書日遲圭覲叢祠之請徒費爾辭

賜定武軍承宣使安定郡王令德辭免除知南

外宗正事恩命不允詔

同前

堯明俊德九族以親今朕擇宗室之老分治同姓亦帝堯之意也卿早從官政晚襲王爵富義理之閱無侈驕之期必能睦族以恩率下以正詢謀惟允辭避何居

賜皇子雄武保寧軍節度使開府儀同三司判

寧國府魏王愷辭增供給錢等不允詔

四月

十八日

勅愷省所劄子奏乞免每月支供給錢五百貫文并本

府一行官屬月支供給各有差事具悉地親者恩宜厚  
位重者祿必豐既以辨儀亦惟馭富嘉予賢子殿乃名  
藩爵已極於真王禮當殊於方郡優加餼廩固周邦宗  
子之城賚及陪臺異漢室左宮之律其祇朕眷毋執而  
謙

賜新除翰林學士左大中大夫王曠辭免除兼

侍讀恩命不允詔

四月十九日

入儀經幄均用時髦然勸講者猶有分章析理之勞進

讀則專以因事獻言為職每艱選任必屬耆英卿比自  
夕郎來陪晝訪衆謂儒林之先進朕嘉法從之老成既  
真鰲禁之除宜冠金華之席雖循故事實茂新恩其務  
廣於緝熙毋過形於謙遜

賜徽猷閣直學士左朝奉大夫提舉江州太平  
興國宮周操辭免除龍圖閣直學士恩命不

允詔 五月五日

卿剛毅簡廉宣慈明敏立朝著不欺之節治郡推愛人

之心甫鎮清源遽移霜露之疾重以民事撓吾耆老進職四北俾為奉祀之光祇服異恩毋煩冲避

賜觀文殿大學士左光祿大夫知福州陳俊卿

辭免加食邑食實封不允詔

五月五日

朕乃者裸黃流於廟颺高煙於郊祖宗顧歆天地並況嘉與中外同其福祿卿秉德蹈義嘗亮於來偃藩南服職貢甚脩既考上儀肆加奉邑非特示均釐之意亦以疇助祭之庸亟其欽承母格明詔

賜觀文殿大學士左光祿大夫知福州陳俊卿

辭轉官不允詔

五月十三日

勅俊卿省所劄子奏辭免收捕海賊倪郎等了當特轉  
一官恩命事具悉屬者姦亡航海出沒風潮間鈔賈舶  
擾島民釋而不誅殆且滋蔓卿能督勵將士以時蕩平  
朕甚嘉之方詔有司條上功狀譬之獵焉發縱指示之  
庸不可以不先也卿其亟服新命使爾衆知朕信賞如  
此賈其餘勇剿殄逋寇俾無遺育尚何後患之虞哉

賜侍衛親軍步軍都指揮使宜州觀察使王友

直辭免除殿帥不允詔

五月二十五日

勅友直省所奏辭免除主管殿前司公事仍乞檢會前  
奏除一在外宮觀差遣事具悉朕既分命猛士以守四  
方又萃天下武鋒而為周廬之衛若時擇師其重可知  
卿沈毅有聞久司禁旅巖除缺長肆命晉遷夫志功名  
者常患無時懷忠義者當思報主求閒避寵豈所望於  
卿哉



賜侍衛親軍步軍都指揮使武昌軍承宣使吳

挺辭免除步帥不允詔

同前

勅吳挺省所劄子奏辭免除主管侍衛步軍司公事恩命事具悉朕厲武經修軍政雖千夫長百夫長猶雷擇而後用况乎總七萃之重護九重之嚴非吾信臣孰寄心膂以卿家世忠義見聞方略召居環列益觀爾能擢典衛兵蔽自朕志勉圖稱塞何以辭為

賜李顯忠辭免特復太尉恩命不允詔

六月四日

勅顯忠省所劄子奏辭免特復太尉恩命事具悉周命  
六卿圻父帥爪牙之士漢分三府掌武與居一焉古今  
沿革雖殊其為重任均也卿方以沈鷺忠實領萬騎於  
天營之內茲復深加異數還畀自上安下之職庶幾因  
名而責實鑒舊而圖新也勉期功名奚必冲避所辭宜  
不允

賜左中大夫參知政事四川宣撫使王炎再乞

在外宮觀差遣不允不得再有陳請詔

六月

卿屬者上書移疾祈釋邊寄朕惟信順者天人之所助  
正直者神明之所聽如卿股肱近弼與國同體其賢可  
尚匪息之安積勤愆和何慮不已璽書諭旨今甫浹旬  
囊封繼來嘉聞治事之語其可求代乎且充國疾留西  
陲裴度卧護北門皆無後艱以有終吉卿其總大體略  
細務時節炎涼輔近服食俾躬有瘳稱朕意焉所請宜  
不允

賜端明殿學士左中大夫知太平州洪遵辭免

知建康府恩命乞除一在外宮觀差遣不允

詔 六月十二日


厥今重鎮莫如秣陵異時謀帥多取正塗之舊非特藉  
賴成望填臨兵民亦惟嘗侍帷幄知德意志慮之詳焉  
卿文學政事著於中外當塗分守尤號循良寬吾顧憂  
無易卿者夫由諸侯而列方伯釋銅魚而佩玉麟固足  
以為吏士之光矣况乎枌榆故鄉近在封部之間哉勉  
稱恩榮毋煩避避

賜鄭藻辭免除開府儀同三司加食邑實食封

恩命不允詔

六月十五日

朕聞外姻之籍懷諸后之家如卿歷事四朝號稱耆舊  
凡今戚里誰與比倫而况尉府十年無瑕而有譽進隆  
命數禮亦宜之不然衮衣綉裳視扶三事朕豈輕以假  
人也哉已告大廷毋勤遜牘



文忠集卷一百五

欽定四庫全書

集部  
文忠集卷一百六十七

詳校官庶吉士<sub>臣</sub>李傳熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>杜文海

欽定四庫全書

文忠集卷一百六

玉堂類稿六

宋 周必大 撰

賜臣僚請免詔二

乾道七年

賜草土劉珙三上劄子辭免起復恩命乞早賜

抽還中使徐侗不允不得再有陳請詔六月

二十三日



朕乃者起卿以西樞付卿以上流手劄丁寧馳遣暫御所以示必用者蓋有三說軍旅為今重事理可奪情公侯以國為家義難有已一也維乃祖父忠槩有聞何以似之莫如移孝二也卿比鎮荊州按行襄漢規模甫定未迄於成今不强起孰卒吾事三也而卿連章累牘不過以名教為疑夫無故而自請短喪宰予所以獲罪有為而要經服事閔子所以合禮漢儒之傳寧無據哉且本朝特起故事非但執政而已文翰近臣如王禹偁楊

億輩皆不得已勉共上命當是之時中外豈不綏靜彼二臣者學識豈不高明知在於今尤難執一亟承委重之意毋蹈辭難之嫌所請宜不允

賜觀文殿大學士左光祿大夫知福州陳俊卿

再辭轉官不允詔

六月二十四日

勅俊卿省所劄子奏再辭免收捕海賊特轉一官恩命事具悉卿夙推德望常翊乾台豈必計功而後增秩顧朕方大明黜陟砥礪中外卿於此時宣國威靈俾海道

肅清姦宄懲艾厥績茂焉進階一等倡吾九牧匪直為  
卿寵也書不云乎德懋懋官功懋懋賞朕惟兼用卿復  
何辭所辭宜不允不得再有陳請

賜草土劉珙允詔

七月八日

勅劉珙省卿四上劄子辭免起復恩命乞檢會前奏抽  
還中使徐偁事具悉朕詠詩之雅有常德以立武事觀  
易之象除戎器以戒不虞用是起卿則於奪情之典初  
未為過而璽書屢下懇避諄確重以疾諗諒非飾辭况

夫暴秋陽事道路使卿或愆調護之節寧不惻我心乎  
俛聽終喪朕固靡忘於眷注也所請宜允

賜右朝散郎權尚書吏部侍郎王之奇辭免落

權字不允詔

七月十三日

勅之奇所奏辭免除吏部侍郎恩命事具悉維乃先正  
甚文且武中興盛際蔚為名臣閱蘊僅施元身遽沒餘  
慶所積在其後人卿洪毅精明力紹家學發揚普訓服  
於禁塗典銓未幾人以為允因能而仕就正貳卿成命

已行當仁何避所辭宜不允

賜侍衛親軍步軍都指揮使宜州觀察使主管

殿前司公事王友直乞宮祠不允詔

七月十三日

勅友直省所奏乞除一内外宮祠事具悉朕於將帥審  
擇之信任之固不輕以一毀一譽移也卿拱護殿巖未  
再閱月何嫌何疑而遽求去夫奉法從事公爾忘私行  
之有常人則誰怨姑安爾位毋拂朕心所請宜不允

賜左朝散郎致仕巫及辭免復龍圖閣學士恩

命不允詔

八月九日

朕乃者躬款泰壇備成熙事德洋恩普徧於遠邇惟時  
共政之舊告老之臣固不可以一眚遺也倣加秘職盡  
洗丹書夫身在林泉之間而名冠西清之籍寵章隆厚  
足耀垂車毋或固辭亟承帝祉所請宜不允

賜觀文殿學士左通議大夫提舉臨安府洞霄

宮汪徹乞守本官職致仕不允詔

九月七日

卿厚重有常直方居簡進服廊廟謀猷允臧出臨藩維

政事因數奉祠養疾昔不得已而聽之今乃辭祿未及  
之年在卿止足之計則善矣獨不體朕眷眷老成之意  
乎勉思自持毋或他慮所請宜不允

賜降授左中奉大夫劉章辭免除顯謨閣學士

恩命不允詔

九月二十七日

進而攝常伯退而直西清此故事也至於加峻職越舊  
班則絕無而僅有焉日者首賁黃中之歸今復用之榮  
卿之去非以二老嘗從我於潛藩乎惟卿文學之優志

氣之裕正惟齒宿尚可告猷而曲折眷留莫回雅意光  
華均佚尚慰我心伐木之序不云乎不遺故舊則民德  
歸厚矣敬體優禮毋為遜辭所請宜不允

賜太尉昭信軍節度使致仕曹勛辭免落致仕

提舉皇城司恩命不允詔

九月三十日

知止者臣子之誼用舊者人君之仁卿祇事兩朝視儀  
二府初終無玷忠謹有聞昔聽其歸既彰冲尚今還以  
位庸示眷懷亟彈已掛之冠勉竭未愆之力所請宜不



允

賜左中大夫參知政事四川宣撫使王炎辭免  
除樞密使應干恩數並依宰臣恩命不允詔

十月二十八日

朕惟卿與學英才負名儒之望精忠閎慮有大臣之風  
使蜀三年厥功茂焉幾廷闕長欲下來歸之詔者屢矣  
而西南重寄弄印莫畀故推殊渥未改行臺蓋位崇則  
國體尊任久則士心附告廷之日縉紳黎庶咸曰允哉

朕亦自欣用人授任之兩得也茲觀來諗乃謂不皇安者有五夫錄德定位非誤賞也以身殉國非市寵也朕之名器其愈重卿之名節其愈光又况江表督師元樞外拜隆興近制今實用之雖復力辭必成命之難回也所請宜不允

賜起復左朝奉大夫充敷文閣待制樞密都承旨兼戶部侍郎葉衡辭新除戶部侍郎不允  
詔 十一月九日

勅葉衡省所劄子奏辭免除戶部侍郎依舊兼樞密都承旨恩命事具悉卿才華智略簡在予衷列職樞廷兼官民部蓋綽綽乎其有裕也孔子曰足食足兵民信之矣朕方與卿圖此三者是以事權雖舊而寵數則新尚攄獻納之遠猷焉用辭遜之常禮所請宜不允

賜敷文閣直學士左朝散郎知成都府張震乞除在外宮觀差遣不允詔

文學政事惟通才為能兼之卿頃在朕前有猷則告付

之征鎮何適非宜邈是少城方安仁愛其可求代乎况  
朕推誠無疑卿乃以嫌自引非所望也益勤宣布慰父  
老子弟之心所請宜不允

賜敷文閣直學士右中大夫知荆南府姜誵辭  
免昨任寧國府修圩岸轉一官恩命不允詔  
十一月二十二日

增秩旌郡守漢制也而朕用之卿向治宛陵於農田益  
宣力焉隄防允修禾黍以茂今雖易鎮賞猶眡功茲用

不待三載亟考而績詔音既下顧欲反汗邪所請宜不  
允

賜四川宣撫使王炎再辭免除樞密使不允不

得再有陳請詔

十二月一日

國家右置鴻樞幹旋兵柄其倚綏之重圖仕之艱方吾  
宰司注意均也如卿文足以斷國論武足以聳天威萬  
里護邊三年於此疇厥望實延登使聯雖未容借箸於  
前蓋已賴折衝於外朕志素定庶言亦諧固非以卿嘗

貢移疾之章而有足發中之詔也申言五說無乃過疑  
朕既丁寧諭指明其不然矣遜函未已豈亮眷懷勉趣  
欽承毋稽我惟行之命所請宜不允

賜翰林學士左太中大夫知制誥兼侍讀王暉

乞守本官致仕不允詔

十二月九日

卿靜重恭寬為時耆舊潤色帝制久而愈華進趨昕朝  
老方益壯告歸之語胡為而至哉且禁林優游義理相  
應固非有簿書期會之勞也尚詢黃髮毋跂二疎所請

宜不允

賜龍圖閣直學士左朝奉大夫提舉江州太平

興國宮周操辭免召赴行在不允詔

十二月十九日

卿作德日休未嘗載偽故立朝則朕信之典邵則民安之蓋簪橐之耆英縉紳之令望也往聞嬰疾聽解郡章今病愈可造於朝是以有賜環之命惟古之良臣乃心罔不在王室雖千里不以為遠而况崇朝之近一葦可航乃欲辭行乎所請宜不允

賜左中大夫參知政事四川宣撫使王炎乞檢  
會前後陳乞宮祠辭免新除樞密使不允不

得再有陳請詔

十二月二十五日

卿于役萬里厥今三年夷夏稔其風聲吏民懷其恩信  
稽之公望宜式端袞繡之歸揆以人情難久詠裳夜之  
制尚惟體國之有素雖復獨賢而弗辭乃涉春以來何  
移疾之數旋觀手牘益慨予心既懇還樞柄之崇復深  
羨祠官之逸豈道之云遠未承前詔之諄諄將禮有弗



周是使歸心之切切苟或異此奚為若斯朕方知臣下之勤勞卿盡念功名之終始勉符推轂別佇賜環所請宜不允

乾道八年

賜觀文殿大學士左正議大夫知紹興軍府事

蔣芾乞檢會前奏除一宮祠不允詔

正月七日

卿自去歲以來數移病告珍臺閒館朕非有靳于卿也顧會稽輔藩徒得君重凡可以損公上之須應州家之

用者請奏朝聞免符夕下卿既知之矣獨不能為朕少  
留惠此一方乎昔汲黯多病卧閣歲餘而東海大治卿  
之啓處視黯何如乃必欲還郡轍耶所請宜不允

賜光州觀察使高郵軍駐劄御前武鋒軍都統  
制兼知楚州陳敏乞除一在外宮觀不允詔

正月八日

將帥貴久任牧守戒數易朕于二者方謹守之卿入摠  
天營出臨邊閫厥有勤績著乎兵民往城于方久念僕

夫之瘁共武之服尚圖王國之安過爾歸心體予眷意  
賜侍衛親軍步軍都指揮使宜州觀察使主管

殿前司公事王友直乞除一在外宮觀差遣

不允詔

正月十八日

朕以卿勁勇絕人擢司嚴陞謂當許國皇恤其他而未  
涉三時繼有避嫌之請朕何賴焉且進而事君退而奉  
親忠孝之道可以兩得求閒雖切于義難俞所請宜不  
允

賜敷文閣直學士右太中大夫提舉江州太平

興國宮方滋辭免知紹興府不允

詔正月二十五日

在昔宣王采新田之芑惟時方叔壯元老之猷我圖牧  
御之能亦取踐揚之舊卿器資寬裕識略精深久推政  
事之才洊履禁嚴之地安于祠館爵乃眷懷遂荒太東  
往率從于海表戎有良翰諒咸喜于邦人亦既剖符毋  
庸抗牘所請宜不允

賜虞允文辭免特進左丞相兼樞密使進封華

國公加食邑食實封恩命不允詔

二月十三日

朕以非涼尊臨士民之上常懼歲月逾邁志勤道遠故  
妙簡忠良光輔不逮以卿碩德冠於當世淵謀合乎古  
人參稽師虞付以國政內之安百姓外之撫四夷上之  
調陰陽下之振法度朕既惟卿之聽卿亦惟力之竭此  
固朝野所共悉朕心所嘉賴也官名聲正就陟上台庶  
言允諧豈必辭避且大勲未集德化未成誠當今之急  
務卿當力啓朕矣得不自任以天下之重紹乃辟于三

代之隆乎安分知止蓋衆人之事丞相奚為及此也所  
辭宜不允

賜梁克家辭免除左正奉大夫右丞相兼樞密  
使進封清源郡開國公加食邑食實封恩命  
不允詔

朕之命相可謂不敢輕矣徐觀其事業詳試其謀謨逮  
夫德望已崇績效已著則信之不疑任之不貳夫豈偶  
然而已卿以英明冠多士精忠簡朕知不出都城遂開

兩社其于彌縫庶政辨察百職功不少矣夫相有左右上應大微之象下存歷代之規朕意素以屬卿故由更制而發號焉非可以謙辭格也若乃張紀綱變風俗暢國威蘇民力朕固日夜念此卿既言之則當成之庶幾盡責難之功而使朕獲任賢之福不亦臣主俱榮哉所辭宜不允

繳張說王之奇辭免西府奏

乾道八年二月十六日準御封付院張說王之奇辭

免各除簽書樞密院事奉割並奉御寶批降詔不允  
臣流落之餘蒙陛下收拾枚拭寘在華近踰一年半  
矣碌碌備位補報闕然夙夜慚懼無以自處倘有所  
見若又不言陛下雖欲赦之如衆論何臣竊見昨除  
張說簽樞舉朝皆曰不可陛下欣然聽納旋即改命  
曾未周歲復有此除羣言紛紛今猶昔也蓋以貴戚  
預政公私兩失不若坐享高爵厚祿之為安陛下神  
聖固已洞照諒說亦自深曉此理何待臣言也若謂



西府當間以武臣則願於大將中擇有威望可以運籌折衝者畀之誰敢異議臣非欲專任文吏也或云緣大臣薦用王之竒因而有此並命雖未可信然去年羣臣爭論之際傳聞聖諭云茲事詳議以此觀之用說非陛下意不為無據且當是時王之竒亦云曾入文字今却與說同升不知之竒以為是耶非耶恐亦未當遽受也臣在隆興初與說同侍殿陛近又與之竒同在六部情分頗熟素無嫌隙今非樂為仇怨

自取擯斥蓋義所當言不得不効論思之萬一耳  
昔唐元和間白居易在翰林奉宣草嚴綬江陵節度  
使孟元陽右羽林統軍制皆奏請裁量未敢便撰本  
朝元祐中師臣避免拜之禮執政辭遷秩之命蘇軾  
當撰答詔亦嘗言其不可卒如所請今除用執政非  
節度統軍免拜遷秩比也臣雖視居易軾無能為役  
顧職守其可廢哉所有二人辭免不允詔書臣未敢  
具草取進止

貼黃

臣竊觀國朝有宣徽南北院使班均二府地親秩重  
文武大臣皆可為之陞下方復古制若命討論以  
處說尤為優異未審聖意以為然否仰戴恩憐忘其  
冒昧伏候誅戮

是日聖旨與在外宮觀  
又有旨今日下出門

淳熙二年

賜通奉大夫葉衡辭免差知建寧府恩命乞改

除一在外宮觀不允詔

九月十七日

卿材資雋明術業閎茂凡所甄擢率由簡知十年之間  
遂寘台衮中道而去予心歎然錫之左符與我共理冀  
宣惠澤庸副眷懷夫當軸于中賦政于外小大雖異其  
可以報主知行所學則一也引疾為解朕何望焉所辭  
宜不允

賜簽書樞密院事李彥穎辭免除參知政事恩

命不允詔

閏九月十九日

朕勵志滿假倚成四輔儀圖俊傑對司文武之權迭運

鈞樞稽合祖宗之制政路無曠朝廷自尊卿學富詞雄  
體莊志裕恂恂守道耻求世俗之虛名疊疊告猷思護  
國家之元氣朕選于衆而知其可用斷于心而任之不  
疑自亮采于幾廷宣宣勞于旬歲運籌合意具孚帷幄  
之謀當軸處中宜贊廟堂之治在旋觀而已審奚固避  
之能回所辭宜不允

賜翰林學士王淮辭免除端明殿學士簽書樞

密院事恩命不允詔

同前

朕寤寐英髦贊襄宥密非純成雅望何以鎮天下之浮  
非沉識訏謨何以定惟中之畫廟勝所繫疇咨敢輕卿  
德厚秉彝文醇貫道更歷紹興之言路允謂舊人考觀  
近世之詞臣厥惟大手退食抱委蛇之節後世宣夙夜  
之勞念久邇於皇猷宜預裁於兵柄且積中者名彰於  
外而自後者人與其先子實汝知政將焉避毋確循于  
冲守其亟翼于鴻機

賜資政殿大學士中大夫沈復辭免知鎮江府

恩命乞除一在外宮觀差遣不允詔

閏九月十一日

卿精明殫洽介潔簡廉萬里錫還言授之政而上書祈  
免至于三四重違懇惻俾殿朱方借曰病衰猶當卧理  
矧無他恙安用固辭勉佩印章體予眷顧所請宜不  
允

賜禮部尚書趙雄辭免兼侍讀不允詔

同前

昔元祐中名臣蘇軾以大宗伯進讀于金華拜恩之日  
首陳六事著在方冊朕甚嘉之卿以蜀莊之珍傳楊雄

之學儷相如之文廸簡在廷華問彰徹侍言典禮榮

關

前修詩不云乎高山仰止景行行止而又奚遜焉所辭  
宜不允

賜中大夫參知政事龔茂良辭免修製加上尊

號寶冊了畢轉兩官加恩命不允詔

係禮儀

使 十一月六日

天以無疆之體敷佑我家丕延親壽予曷敢不鋪張揚  
厲以對越景況乃仲冬至親帥百辟並崇父母之榮



號金石在列冠劍在庭霽景曠溫羣情悅豫歷觀書傳  
所記蓋未有殊尤絕迹可比于今者也卿以鴻儒碩望  
摠領衆職淵源復貫既閑習乎禮文陟降多儀又厭服  
乎觀聽進階加邑于理則宜且大典慶成熟云偕賞自  
我作古寧問故事若關然辭之殆非股肱喜哉之誼也  
賜參知政事龔茂良上表再辭免禮儀使轉兩

官恩命宜允詔

十一月八日

鏤玉揚徽慶太上歷年之永連珠告瑞適仲冬朔旦之

臨天人協應以在茲家國均休而未艾眷言近弼實贊  
昌期予欲新曠古之禮則汝明予欲展事親之儀則汝  
翼予欲播乾安坤安之樂于金石則汝聽予欲形天大  
地大之功于典冊則汝為底績居多遷官匪遇而乃力  
避便蕃之寵面陳確至之言謂將豫泥于泛恩豈必曲  
從于前比先勞後祿素嘉儒行之優下濟上行滋嘆謙  
光之美方共由于此道姑勉徇于乃誠所請宜允

臣契勘故事在京臣僚上表辭免恩命若不允則

降批答今來參知政事龔茂良辭免禮儀使轉  
兩官恩命奉御寶批降批答所請宜不允若依故  
事只當降詔臣今撰述書寫進入合依例請寶下  
本院給賜伏乞睿照

賜參知政事李彥穎辭免書撰冊文轉一官不

允詔

同前

內則父子外則君臣人之大倫也今者太上以仁聖綏  
壽嘏朕以孝敬極尊崇天人和同福祿並應父子之道

備矣元首股肱相須成體則於君臣之際可不共其光  
榮乎卿以名世之儒久儀廊廟討論鉅典被飾厥文所  
謂嚴樂之筆精淵雲之墨妙蓋無之矣用是進秩不為  
無名況朕寘卿四輔之列咨卿萬幾之事寵章徽數未  
嘗有靳而獨愛此一官乎所請宜不允

賜端明殿學士簽書樞密院事王淮辭免篆寶  
轉一官不允詔

朕登進輔臣周旋帷幄既不以一善為最又不以考績

而陟若乃國有大慶共其寵光則異數依加厚羣臣莫望斯名位之辨等威之制也屬者備物典冊增尊稱於德壽閔休偉績振古未有濟濟多士咸以列侍為榮時卿名儒服在樞近允資鴻筆載琢斯章慶澤之行當由貴始蓋有非常之功者必因夫非常之事有燦然之文者必濟以懽然之恩典禮所闕卿固不得而獨避也所辭宜不允

賜參知政事李彥穎上表再辭免撰冊文轉一

官恩命宜先詔

十一月十一日

昔大中祥符間執政王欽若陳堯叟皆以製述封祀壇  
頌之功超進顯秩載在國史有榮耀焉今朕修稀世之  
濶典加太上之顯號而卿以高文大冊發揮盛猷是用  
倣章聖舊規循乾道近比進階四品庸答儒效而免章  
沓至陳義益高謂朕方策勵事功愛惜名器而身參機  
政宜率搢紳夫遜禮之主也謙德之柄也大臣如此足  
勸多方豈以一官易茲二美敬從雅志良極嘆嘉所請

宜允

賜端明殿學士簽書樞密院事王淮上表再辭

免篆寶轉一官恩命宜允詔

同前

朕觀易之象曰勞謙君子萬民服也詩之雅曰行歸於周萬民所望夫辭受明於上則廉遜興於下豈不所操者約而所利者博哉日朕茂輯曠儀衍榮親之號而卿實聯政路宣秉筆之勞越進文階將侈邦家之慶不獨示卿之寵而已顧乃洊形冲避且以名器為言蓋大臣

者民之表也故范宣子遜而其下皆遜是可化民成俗  
矣朕雖欲不聽得乎所請宜允

賜資政殿大學士中大夫知建康軍府事劉珙

辭免起發本府教閱軍兵特轉一官許回授

不允詔

十一月十一日

卿名高九牧任重十連馭軍馳整暇之聲體國得忠勤  
之誼歌周詩而遣戍既有成勞馳漢爵以賞功可無異  
數故進階所以勸諸道而申命所以優大臣人皆曰然



卿尚何避

賜奉國軍節度使殿前副都指揮使王友直乞

除一在外宮觀差遣不允詔

十一月十六日

四牡之詩曰王事靡盬不遑將母此羣臣宣勞於外懷  
歸之辭也今卿以將帥之才為朕倚信擢居環尹閱歲  
滋深夙興單衛上之勞退食享奉親之樂惟忠與孝寧  
廢兼資苟勉勵之有加立功名其未晚所請宜不允

賜龔茂良辭免差權提舉編修玉牒不允詔

十

一月十八日

周用中士奠繫世漢晉命九卿典屬籍唐開成以玉名  
牒至與史冊並驅是豈古今異轍哉法浸久而益章官  
隨時而愈重故也況我國家發祥云遠祖功宗德視昔  
有光文昭武穆與天無極則夫創寶藏之殿設纂修之  
官揔於柄臣理固當爾卿以經世之學華國之文參調  
化元秉德蹈義兼領斯事蓋優為之豈以約史定令而  
廢宏綱之舉乎亟其欽承母格成命

賜李彥穎辭免差權提舉國史院實錄編修國

朝會要不允詔

同前

信史垂後世之法類書裒當時之事皆大典也今自熙寧迄靖康有六十年未備之史則筆削不可以不嚴粵建隆暨紹興有八百編已成之書則會粹不可以不續雖討論屬之諸彥而董正資吾輔臣卿學該古今文有師法翊我機務言忠謨嘉舉滋以旃何職弗濟顧豈不能據三長以摠太史之任乎其趣汗音毋以遜避為也

賜降授朝散大夫權吏部尚書兼詳定一司勅  
令蔡洸辭免經修進吏部七司法轉一官恩

命不允詔

十二月十六日

太宰以法待官府之治其來久矣卿以名德之裔簡于  
朕懷擢長天官實無議令用詩書而輔法律蓋有家學  
存焉逮此奏篇灼知勤勩進階一等時乃故常夫手定  
章程職居銓綜制而用之謂之法既已與聞推而行之  
謂之通固將有望抗章避寵其可曲從所辭宜不允

賜觀文殿大學士銀青光祿大夫知福州軍州  
事陳俊卿辭免起發禁軍土兵轉一官仍許

回授不允詔

十二月二十一日

朕惟法等其功周勲以懋賞延於世舜德斯隆茲酌用  
於前規庸申褒於舊相卿久儀槐棘告帷幄之謀重填  
粉榆底藩維之績觀調兵之如約知制閫之宣勞增秩  
有差雖眡營屯之數移恩無間則隆體貌之私毋守一  
謙亟共再命所辭宜不允

賜安慶軍承宣使提舉德壽宮張去為辭免該  
遇德壽宮慶典轉三官依條回授恩命不允

詔 十一月二十四日

天錫太上純嘏眉壽無有害乃立春氣應歲盛禮于宮  
掖肆大青于中外若時左右謹信之臣實宣夙夜奉侍  
之力予維寵嘉之蓋慶澤之行職親者在所先歲久者  
從其厚古今之通誼也又何疑焉所辭宜不允

賜少保岳陽軍節度使充萬壽觀使承陽郡王

居廣辭免加食邑食實封不允詔

十二月二

十五日

唐乾元間既加崇太上聖皇之號因肆青中外三品而  
上賜爵有差今朕舉稀闊之典慶君親之壽甲午制書  
推惠甚遠位隆屬近顧反不及耶增衍封租良不為過  
尚何遜避之有所辭宜不允

文忠集卷一百六